

寒
松
堂
集
一





寒松堂集
(一)

魏象樞著

寒松堂集目次

卷一 一

奏疏 刑科 工科 刑科

卷二 二三

奏疏 吏科 詹事府 光祿寺

卷三 五三

奏疏 貴州道 都察院 順天府 戶部

卷四 八五

奏疏 都察院

卷五 一九

序 記 傳

卷六 一七三

書簡

卷七 二〇一

書簡 尺牘

卷八 二四五

祭文 墓表 墓志 碑銘 行狀 紀略

卷九 二八七

雜著

卷十 二三七

庸言

寒松堂集卷一

蔚州魏象樞著

奏疏

刑科 工科 刑科

刑科給事中臣魏象樞謹題。爲蠲荒節荷聖恩。祈敕速行榜示。以普皇仁事。臣聞恤患救災。聖朝大政。今歲各省災傷。百姓之延頸望恩。已非一日。我皇上軫念民生。卽於疏聞之日。遣員查勘。酌量蠲恤。業已節次報部題覆矣。臣思地有近遠。報有遲速。其被災極重。未經勘報者。想部臣自能速催核請。以杜明季徵後補還。吏侵書兌之弊。卽今明旨旣下。而自計部以及撫按。自撫按以及道府州縣。上下咨移。必非旦夕可達。若不先張榜示。使小民共見共聞。竊恐追呼之下。徵收蒙溷。德意遲留。將朝廷浩蕩之恩。究不得實有沾被也。伏祈皇上敕下該部。凡題覆災傷。奉有俞旨者。其被災若干畝。蠲免若干石。多刊榜示。速行撫按懸掛通衢。俾百姓共曉皇仁。儻地方官敢有違旨剝民。除撫按嚴劾外。容臣等確訪指叅。庶混徵之害可革。而走險之萌可銷也。謹題請旨。奉聖旨。戶部知道。

又

刑科給事中臣魏象樞謹題。爲摘叅劣撫徇縱順賊。縣官藐法悞國。仰祈聖明。亟賜斥究。以重節鉞。以固

封疆事。臣惟朝廷用人。莫重於節鉞。而撫臣盡職。首事乎封疆。封疆所係。雖撫臣與羣吏共之。而清正率屬。嚴肅持法。則專責之撫臣矣。若安徽巡撫王懷。蓋不可一日容於地方者。懷本庸流。謬承重任。負債萬餘。取償地方。內外諸臣。共聞共知。豈可以聖朝培植之疆土。供不肖者償債之需耶。臣有淚在喉。方期入告。適因辦事垣中。見江南督臣馬國柱。疏叅縣官逆迹已著等事。內稱東流知縣鄧繼球。僞文迎賊。不忠不義。業奉嚴綸。置以重典。仰見我皇上除奸誅逆。法甚斷也。臣從全疏中讀懷全咨。見其曲庇繼球。語言悖謬。大可駭異。繼球爲懷屬吏。移家出城。懷所明知。且搜回庫貯蘆課等銀九百餘兩。逆迹顯然。誰敢諱之。懷既不肯特疏題叅。又令照舊任事。是爲何心。據懷云。舍短取長。臣不知通賊盜庫之官。更有何長。而懷乃亟亟取之乎。尤可異者。繼球獻銀三千金。未經呈允。突解撫衙。明是窺懷貪婪。敢借助餉之名。以通暮夜之賄。天日在上。將誰欺乎。設懷心畏四知。卽當移會督按。嚴加提究。何俟督臣有咨到懷。懷始說出三千金之獻。又巧立一貯庫之名。至其中誇許繼球。一則曰頗有能聲。再則曰吏才頗稱。將蓄謀不軌。包藏禍心之事。始終不道一言。懷欲自掩其非。不得不爲繼球飾罪耳。况撫臣責在封疆。當此逆賊未翦之際。正宜嚴飭州縣。效死固守。如懷所云家眷可行等語。是率下以瓦全身家之路。而自免於失陷地方之咎。獨不思封疆何地。可以賊至而逃。賊去而返乎。似此存心舉事。目無國法。臣恐徽池諸郡縣。聞風效尤。必至遇警者有異心。行賄者得故物。貽禍封疆。眞可畏也。國家抑何利有此撫臣哉。伏祈敕部確議。如果臣言不謬。重治懷以藐法悞國之罪。庶封疆有幸。貪劣知儆矣。謹題請旨。奉聖旨。該部嚴察議奏。

又

工科右給事中臣魏象樞謹題。爲小民遷徙最艱。聖恩垂念已至。仰體皇仁。陳管見以固國本事。臣聞太平之世。以百姓樂業爲第一事。我皇上因輦轂之下。滿漢雜處。盜賊難稽。特諭商民人等。盡徙南城。復蒙軫念遷移之苦。限以來歲。至寬也。勞以搬銀。至厚也。原房任民拆賣。至便也。民卽至愚。無不仰感皇恩之浩蕩者。但南城塊土。地狹人稠。今且以五城之民居之。賃買者苦於無房。拆蓋者苦於無地。嗟此窮民。一塵莫必。將寄妻孥於何處乎。臣愚謂有地不患無房。如城外閑地。堪民營蓋者甚多。因係官物。莫敢問之。此民之不苦於遷徙。而反苦於居處也。恭請敕下該部。盡察前三門外官地官房。可爲民居者。許令量地輸銀。給以印照。俾作永業。不得少有遺漏。亦不得擅行混占。則片址尺地。皆成室家。億萬戶棲止之謀。卽千萬年根本之計也。抑臣更有請者。民間賃買房屋。原有定價。近聞鬻房之家。任意增加。高騰數倍。勢必至罄家所有。不足以卜數椽之棲。則遷者更多一苦矣。併祈天語申飭。令該管地方等官。概平一價。凡買者。賣者。典者。賃者。各勿增減。共相保恤。庶比屋可封。國本永固矣。微臣職列工垣。聊獻葑菲。伏維聖明採擇施行。謹題請旨。奉聖旨。著工部督同五城御史。察南城官地。併民間無房空地。將遷徙官民好生安插。

又

工科右給事中臣魏象樞謹題。爲聖朝大禮旣行。亟請更定會典。以明職掌。以懸國制事。臣惟古帝王創制立法。代有因革。亦代有損益。自唐虞以迄宋元。典要具存。卽明朝之會典。亦不過法古而定制也。我國

家定鼎五年。禮樂大備。法度維新。廟謨煌煌。足垂萬禩。乃有次第修舉。萬不可缺者。莫如會典一書。夫會典所載。皆百臣奉行之政令。諸司分列之職掌。卽官禮諸制。無不條悉其中。今各衙門亦旣倣而行之矣。第參同酌異。豈可盡憑因時制宜。不無更變。未經聖明之新裁。終非昭代之令甲。臣下何由遵守而罔渝乎。况往朝每代有變通之法。我朝創業無畫一之程。非所以示臣工而重金石也。伏乞皇上敕下該部。先令各該衙門。折衷前代。參酌滿漢。確議詳明。彙送內院裁定。然後刪繁就簡。編輯成書。恭請欽命嘉名。懸爲成憲。庶臣工有秉式。制度無紛更。其於治道非小補也。謹題請旨。奉聖旨。該部知道。

又

工科右給事中臣魏象樞謹題。爲擅殺屢有明禁。有司悖旨專行。祈敕嚴究。以彰國法事。臣惟我皇上好生如天。愛民如子。內外臣工。各宜恪承德意。乃臣近訪得牧民之官。有殺人鬪人。不經題奏。恣意擅行。人共知者。敢指名爲皇上陳之。如山東平陰縣知縣王國柱。縣衙鬪死兼殺死生員牛射斗等。民高棟等數人。臣心竊疑之。若果係窩盜通賊。何未聞奏請處決。若託稱臨陣斬獲。何未見捷功塘報。事犯極刑。自有國律。副殺之權。不在縣官。况擅殺之奉嚴禁。已非一日。前撫臣土國寶。獲內地之奸一疏。奉有內奸與在陣擒獲不同。宜嚴審固禁。馳奏候旨。何得擅殺之旨矣。丁文盛悖旨擅殺一疏。奉有崔似驤背旨擅殺。好生可惡。嚴究擬罪之旨矣。按臣鄧孕槐。背律專殺一疏。曾經部覆。奉有楊允昌革職提問之旨矣。夫撫臣不得擅殺。則縣官可知。似驤允昌。俱經提問。則國柱何辭。臣職司耳目。若憚風聞之罪。緘口不言。誠恐

司牧之官。人人效尤。藐視上旨。草菅民命。非所以仰體我皇上好生愛民之心也。伏祈敕下該撫按。嚴究國柱所殺數命。果否重情。未殺未鬪之先。曾否詳允。生員牛射斗等罪狀。果否申報。學臣黜名。國柱不遵屢旨。應否治罪。再望天語申飭。以戒將來。庶足昭國法而廣皇仁也。謹題請旨。奉聖旨。王國柱擅殺事情。著該督撫按確察。嚴究具奏。該部知道。

又

刑科左給事中臣魏象樞謹題。爲督撫之訪糾疊見。道府之徇縱難寬。恭請聖明。立法處分。以清吏治。本源事。臣惟察吏莫重於舉劾。舉劾莫嚴於開報。朝廷既以舉劾責之督撫。按而督撫按即以開報責之道府。蓋因各屬州縣。相去甚近。聞見亦最真。或賢或否。一舉一動。無有不知者。執意不肖有司。專以私情厚賄。密結夤緣。恣意貪汙。全爲遮蓋。甚至同城共處。穢蹟彰聞。而道府反指爲循良。督撫按不掛之白簡。顛倒賢否。縱容有司。莫此爲甚。况開報係道府職掌。奉有俞旨。臣垣中屢見督撫有自行訪糾者。如督臣張存仁。有禁令被訐賊真之疏。督臣陳錦。有文武結黨貪橫之疏。撫臣劉宏遇。有特糾貪婪之疏。所叅皆異常貪惡。賊私疊疊。而道府全無開報。臣不知其職掌何事乎。假如督撫少一番體訪。而道府必多一層蒙蔽。又安望其正己率屬。爲民除害耶。聖諭所謂大貪大惡。反多徇縱。坐此弊者居多耳。我皇上親臨大政。察吏必嚴。近讀上傳。有開報不實。察究舉奏之旨。從前積弊。已在聖明洞徹中。臣謂督撫訪叅而全無開報。則容隱瞻徇之弊。更有甚於開報不實者。臣請自今爲始。凡督撫按叅劾官員。果係道府廳真實開

報者。公而且明。克盡厥職。如督撫按自訪特糾。本內未註開報字樣者。道府廳以溺職論罪。或督撫按指名糾舉。或吏部據疏處分。如被叅之官。原係浮躁昏庸。其罪在不明。以降罰處之。如被叅之官。原係奸惡貪虐。其罪在不公。以革職處之。此法一行。庶道府諸臣。上畏朝廷之命令。下愛自己之功名。開報無不公慎。且督撫按諸臣。各有採訪。各有特叅。亦不得借口開報。反以叅劾之權。盡委道府主張也。提綱挈領。大法小廉。吏治從此一清矣。如臣言不謬。伏乞敕下該部院確議。嚴飭施行。謹題請旨。奉聖旨。該部院確議具奏。

又

刑科左給事中臣魏象樞謹題。爲請定藩司會計奏報之法。以明錢糧。以嚴覺察。以足國用事。臣惟國家首重戶口。次重財賦。蓋民之膏血。國之命脈所係也。我朝定鼎以來。錢糧總歸戶部。於順治七年內。會議仍歸各衙門。其銷算奏請遵旨舉行者。臣不敢復贅矣。臣思在內之錢糧。乃部臣掌其所出。在外之錢糧。乃藩司掌其所入。一絲一粒。俱當上告君父者。前此部臣既無奏報。而藩臣歲報之冊。曾否到部。亦未知其有無扶同。並未見其作何叅駁。待至七年之久。稽核尙無頭緒。總由所入之數不清。故所出之數亦不明也。夫欲令各部之銷算。徹底清楚。先令各省之錢糧。逐款奏聞。臣請自八年爲始。各省布政司官。於每歲終。會計通省應徵錢糧若干。應解某衙門錢糧若干。起運若干。存留若干。支發若干。蠲免若干。拖欠若干。分別款項造冊。呈送該督撫按查核。恭繕黃冊一套。撫臣會題總數。隨本進呈御覽。其布政司例造清

冊咨送在京各該衙門互相查考。有弊卽糾。旣可以杜藩臣之欺隱。又可以核部臣之參差。實大有裨於錢糧者。况進貢芽茶銷繳郵符俱有奏章。獨朝廷數百萬金錢。百姓億萬家膏血。不以上聞。非所以重國賦而嚴覺察也。臣查往例戶部奏銷原有定期。今撫臣冊奏宜在各部奏銷之先。所謂先計入而後計出也。至於勦逆產價。蘆鹽租課。贓罰銀兩。本折物料等項。凡載在賦役之內。與不載賦役之內者。一概報明。庶錢糧清而國用足。卽以定藩司之賢否可矣。如果臣言可採。伏乞皇上敕下戶部。確議速奏。永著爲令施行。謹題請旨。奉聖旨。著確議速奏。該部知道。

又

刑科左給事中臣魏象樞謹題。爲聖意恤民甚深。有司奉行多弊。謹遵旨陳言。實普皇仁事。臣恪讀上傳。停止城工。盡免加派。查照完過數目。開除八年正額錢糧。復諭各該督撫嚴察地方等官。不致欺罔小民。聖慮至周。民命頓甦矣。乃臣尙有鯁鯁過計者。敢爲我皇上陳之。有司派徵錢糧。皆假吏胥里書之手。本官自通算法者。百無一二。其賢者立身清潔。或因蒙蔽而不能知。其不肖者貓鼠分肥。通同漁獵。誰肯逐兩逐錢。明白兌算。以仰副皇上軫恤至意乎。卽如淮揚舊督臣吳惟華。疏叅山陽縣知縣王佐。徵完城工銀二萬有餘。止解銀六千有餘。鹽城縣知縣于學政。徵完城工銀一萬八千有餘。止解銀七千有餘。彼時大工急需。催徵如火。竟將已徵未解之銀。侵吞過半。欺罔朝廷。一至於此。儻更有貪婪之官。未經發覺者。糧銀旣入私囊。灑派盡憑書役。或詭報未完。或開銷別用。斷不肯以久肥之物。給算民間正額。臣言及此。

臣淚欲下矣。雖朝廷有浩蕩之恩，而小民終不能免剝削之苦。待至血枯髓盡，而後叩闕陳情，亦已晚矣。臣以爲欲除大弊，宜立良法。方今開徵屆期，合無敕下該督撫按，速檄各該州縣，照依本年赤歷易知單，備造格眼清冊，明註某戶某人，共該某項糧銀若干，除收過城工銀若干，又奉恩詔蠲免若干，通共開除若干，止徵若干，併註某人清算。某人書寫，本官查對無弊，呈送督撫按臣，細加覆核。如果總撤相合，徵免無悖，督按二臣將原冊存案，撫臣將原冊鈐印發徵。儻有數目多寡，挪移錯亂，及改冊徵收，自立紅簿等弊者，立行糾叅，以違旨論罪。庶小民不爲貪吏所欺，皇仁不爲貪吏所蔽。蚤一日得沾一日之恩也。伏乞敕下戶部，作速嚴飭施行。謹題請旨，奉聖旨，著確察速議具奏。該部知道。

又

刑科左給事中臣魏象樞謹題。爲睿意圖治方新，政事停閣非體，謹激切陳言，仰祈鑒察事。臣惟立政以寬舒爲本，圖治以振作爲先。我皇上臨御以來，仁政藹藹，天語煌煌，精明惇大，帝王同揆，所仰體而奉行。之者，在內六部等衙門，在外督撫等衙門，其切要者也。臣見順治八年以前，或一事而奉旨下部，經年累月而不覆，或一事而行察在外，經年累月而不報。古來有此治體乎？卽從前不必深論，今自正月十二日以後，廟堂之上，雷厲風行，內外之間，官嚴吏肅，不復慮天下事之有稽滯矣。及見一切奉旨章奏，並各衙門應行事宜，已覆已行者固多，而未覆未行者尙自不少也。其中雖有行察咨議者，頗需時日，亦有不待行察咨議而宜奏宜行者，一概停閣，未知何故，似乎近日之鼓舞奮勵，又緩於皇上親政之初。臣心竊惜。

之。夫臣子當遭逢聖主之日，爲國爲民，仕勞任怨，滿漢同心，大小竭力，此其時矣。在諸大臣肩宏任鉅，豈不能仰體聖懷，第恐因循漸積，司官之塵留者，堂官不問，書吏之遲延者，司官不察，諉事任而虛責成，臣竊爲昌明之世，不取也。况督撫按奉行諸事，皆視各部之緩急，以爲遲速。若督限不嚴，則在外之稽遲益甚，能保稽遲間無徼倖夤緣之情弊乎？臣愚以爲事體有重輕，道里有遠近，限期有寬嚴，其咨行在外者，地近則限三月，地遠則限半年，可覆也。如果事關重大，反覆詳慎者，或限至九個月，或限至一年歸結，須將內外行咨，咨到批駁申詳，併咨覆案呈，年月日期，咨內逐一註明。本內逐一開寫，則部院之稽核參駁，有據矣。至於在京各衙門，事之繁簡不一，官之多寡亦不一，但近在輦轂，不過司議說堂而定，一月之內，可覆也。如果事關重大，長慮熟籌者，或遲至一月半，或遲至兩月歸結。除軍國機密原係密封者，自應密奏外，其餘諸事內，嘗有一二口奏之事，口傳之旨，不經發抄者，臣思綸言至重，恐有萬一之誤，以後悉當具本請旨，與天下共見之。若行移發落，定期不過五日，則吏書之蒙溷耽延，可杜矣。伏乞敕諭各該衙門查照通行申飭，或敕下內院九卿大臣議臣所言，是非定奪，仰候聖裁。臣職在進言，激切無忌，貼黃難悉，統望聖明垂鑒施行。謹題請旨，奉聖旨，稽滯事件，及定限等項，著確察詳議具奏。該部院知道。

又

刑科給事中臣魏象樞謹題。爲奉詔之夙弊有三，請旨申飭，以重綸音事。竊照本年正月內，恭遇皇上躬親大政，頒詔天下，臣實奉有捧齋之命。因知地方各有弊習相沿者，不止一端，第從一二處推之，天下可

知也。就臣所見聞者推之。諸臣可知也。然部臣例以各府遵依爲據。安能盡知在外之情。臣雖抱病馳驅。頗行改正。若不奉旨申飭。亦非畫一之規。謹開列具陳。惟聖明垂鑒焉。一開讀不許遺漏。凡開讀地方。官吏師生。軍民商賈。環擁而聽。若因循弊習。止讀首尾數句。將所開赦款。不令衆聞。以便欺隱。今後宜於詔到地方。無論有款無款。預飭宣讀生員。務令逐字逐句。高聲朗讀。如妄引舊不全讀之例。故行遺漏者。欽差官將本生併教官。叅送撫按衙門究懲。則遺漏之弊可清矣。一謄黃不許塵匿。凡詔到例宜謄黃。原欲深山窮谷。黃童白叟。共見共聞。若因循弊習。止於所司署前張掛一紙。或止於該房存案。全不張掛。貪官汙吏。希將款內所免之糧。可以朦朧侵收。赦前之事。不肯禁人訐告等情。今後宜於謄黃處所。一字一句。自行查對明白。刻板刷印。州及大縣。各頒發三百張。中縣頒發二百張。小縣衛所。各頒發一百張。務令莊村鎮寨。到處實黏。各取里甲甘結。申報該管上司。如有官吏匿詔蒙結等弊。撫按查出糾叅。欽差官除照例取具遵依外。仍取本布政司及本府官印信甘結。明開所屬地方若干。共發謄黃若干。於某月某日。眼同頒發。本官差回。一併遵依繳部。查核存案。則塵匿之弊可清矣。一奉行不許稽遲。凡該府謄黃。例差生員轉捧所屬各州縣開讀。以重其事。或因謄寫遲延。或因刊刻稽滯。以致百姓懸切望恩之日。正是貪官乘機蒙蔽之日。今後宜於轉發謄黃地方。定限三日。欽差官立催頒布。方得出境。於詔到州縣。本府仍勒限印官備查款內一切奉行事宜。各照道里遠近。逐項造冊。詳報本府轉報撫按。速奏速行。如有遲違不報。及蒙具遵依者。撫按立行叅究。則稽遲之弊可清矣。如果臣言不謬。統祈敕下禮部。凡遇頒詔通行申

飭庶臣子奉簡而行。匪循故事。父老扶杖而往。徧詠新恩矣。緣係條列。字稍溢額。伏望聖宥施行。謹題請旨。奉聖旨。著照款飭行。該部知道。

又

刑科左給事中臣魏象樞謹題。爲聖德勤修日懋。輔臣敢沃宜周。敬陳菲言。以盡愚忱事。臣惟自古帝王。秉德雖由天縱。進修實賴輔成。我皇上性本仁孝。道崇儉勤。自親政以來。乾綱獨斷。治每重於養賢愛民。帝鑑時親。事必期於準今酌古。旣勤於政。復勤於學。則聰明日進。聞見亦日紛。聞見日紛。則涵養宜日厚。凡此皆輔臣之朝夕贊成。而惟日不足者也。臣於本月內兩次直日。臣科一遙瞻御輦。一近聽鼓聲。仰知萬幾之暇。偶一燕幸。誠爲少節繁勞。願養聖心。且時值秋高氣爽。或隨地而講求治理。或隨時而諮念民艱。召命曾否下頒。輔臣曾否在列。微臣俱不得知。方今聖政維新。機務孔多。中外想望治平。匪同昔日。如皇上近有所御。自當追隨法從。以效敢沃之忠。儻遠有所幸。尤當諫止鑾輿。克盡保傅之職。責在輔臣。自古然矣。竊思皇上批決章奏。輔臣得侍御前。大政尙有面議。况駕出宮禁。其前後左右。斷不可無才德碩望之老臣也。萬一勞逸不節。出入不時。輔臣不力爲奏請。而又誰爲奏請者。此實關於聖躬之大。臣犬馬有心。安能嘿嘿而處此。伏乞皇上鑒臣愚忠。寬臣冒昧。凡遇親臨便殿。或駕御午門。卽召滿漢輔臣二員。講說帝王用人行政之本。人心道心之微。以弼盛德。仍擇滿漢詞臣。文學雅重者。六員或八員。以備顧問。併注起居。再請退朝以後。節膳卻慮。潛心治道。以圖勵精。皇城以外。命駕勿輕。保護必慎。上以慰皇太后。

慈懷下以慰臣民厚望。微臣幸甚。天下幸甚。謹題請旨。奉聖旨。知道了。

又

刑科左給事中臣魏象樞謹題。爲考核有司漸次入告。恭請敕部速行察議。併行嚴催事。竊惟我皇上親政之初。灼知吏治不清。卽傳有考核有司之諭。嗣因奏報稽遲。嚴綸再下。合計之已經八月有餘矣。近見督撫諸臣之疏。節次奉旨下部分別察議者。已將過半。在部臣詳慎其事。或待彙齊核覆。而臣以爲不必也。夫有司既經考核。必分次第。旣分次第。必有去留。其賢者列在上等。尙可安心供職。內有德才下列。文義不通者。自知功名難以瓦全。棧豆不能久懸。一己之囊橐欲飽。百姓之痛癢何關。乃將地方荒殘。小民生死。付之將去未去之官。誠爲可慮。臣見山西按臣劉達疏。叅逃官復回。尙且流毒於民。况身在地方。印在掌握者。又不知何如也。卽使本官守法聽議。而上官與下民。亦各以五日京兆相視。凡地方中城守。錢糧。盜賊。刑獄諸務。保無掣肘難行。因循廢弛者乎。旣云不堪民牧。又復姑留地方。有百損而無一益。今卽覆核得旨。計至圖官抵任之日。近者尙需半年。遠者尙需七八月。若此時不行。又當在一年之外。恐亦嫌其太遲矣。臣謂次第核覆。卽次第銓補。似較彙齊爲便也。至於各省咨到雖有遠近之分。地方雖有久定初定之異。乃天語切責。何等嚴重。今尙有觀望瞻徇。考核之疏未到的者。謂督臣有事於行間。按臣自有耳目。謂按臣有事於棘闈。撫臣何無奏聞。遲之又久。品題不定。儻亦有難以入告之情乎。况臣恭繹上傳。內云司道乃有司綱領。尤宜察核。原非以考核責司道也。若止據司道冊報而定官評。文義未經其面試。德

才不採諸輿論。在督撫卽謂結此一局。臣知疏上御覽時。難逃明鑒。其實意澄清與虛應故事。正可就此事見之。是又諸臣所當倍爲謹恪者也。統祈敕部一面分別奏請。一面嚴飭速報。地方民生俱有攸賴矣。謹題請旨。奉聖旨。這本說的是。吏部知道。

又

刑科左給事中臣魏象樞謹題。爲嚴考績之大典。禁反噬之刁風。請旨預飭。以佐新政事。竊惟計典三年一舉。關係吏治。實爲重大。矢公矢慎。責在撫按藩臬諸臣矣。臣見順治七年。查出大計冊本。矛盾乖謬。情弊多端。各註一官而賢否互異者有之。各具一冊而洗改不同者有之。甚至大貪舉爲卓異。小吏掛入彈章。雖經駁叅。成何計典。今銓臣請行十年大計。乃皇上親政來首舉之大計也。在撫按諸臣。仰佐新猷。尤宜慎密。露章果出獨見。不必相同。註冊須有定評。難容互異。眞廉眞卓。何庸濫舉多人。大惡大奸。不許徇情漏網。人有改節者。勿因前薦後叅而存顧忌。事有已著者。勿因去任見任而生偏私。道府考州縣不公。則先叅道府。藩臬察道府不實。則併議藩臬。功令煌煌。務期上副朝廷黜陟之典。下快小民是非之心。臣所謂考績宜嚴。請旨預飭撫按諸臣者此也。臣又見近日不肖之官。身被叅劾。撫詞誑噬者。不一而足。今奉旨嚴究。奸罪難逃。况大計者。國家懲貪之要務。較尋常叅劾。不啻數倍。若誣害肆行。上官畏懼。咆哮要挾。奸人得意。開者既不敢開。奏者亦不敢奏。計典已無綱紀。吏治安望澄清。臣查會典內一款。凡考察被黜官員。有不服考察。撫拾妄奏者。發遣爲民。典例昭然。有犯必罪。上伸國法。下懲貪風。臣所謂反噬宜禁。

請旨預飭部院諸臣者此也。統乞聖鑒施行。謹題請旨。奉聖旨。著議奏。該部院知道。

又

刑科左給事中臣魏象樞謹題。爲直糾溺職藩司。請敕速議重處。以懲積貪。以清國計事。竊惟各省布政。爲府縣之綱領。錢穀之總匯。一粒一絲。或徵或解。未有不從本官衙門經理者。臣見蘇松按臣秦世禎。疏叅江南蘇州府等處額布錢糧。侵欺五十餘萬之多。積至數年之久。雖府縣及奸解諸人。蒙混分肥。而疏內所云。徵者不給。給者不辦。辦者不解。部臣旣已行催。藩司豈未聞見。但諉於府縣之虛報。誰其信之。且又云提催押催。催其使費耳。又云布旣不完。則使費愈大。明是打點藩司。免其究報。非區區蠹役。可用成千成萬之使費明矣。卽如見任左轄劉漢祚者。任匪不久。責匪不專。而此項錢糧。此等弊竇。知而不報。是爲何心。全然不知。是爲何官。東南財賦之鄉。可容此如蠭如贖者司國計乎。况每年具有報部文冊。將此五十餘萬之金錢。不知作何開銷。以爲未派。而萬姓脂膏。已果貪腹。以爲旣解。而未據批迴。難以蒙報。原冊具在。無惑乎督臣馬國柱考成疏中。曾言其完欠不明也。方今國用不敷。會議搜括。乃藩司缺賦五十餘萬。誤國已極。不處何待。近雖奉有察明之旨。臣恐耽延時日。婉轉調停。勢必卸責於事故遷移之府縣。而藩司作袖手之人。銀布成鳥有之物。因循漸深。塗飾更巧。國家法紀盡壞矣。伏乞皇上敕部立察歲報。原冊會開已完未完。部臣曾否行咨催解。該司任事以後。按臣發覺以前。果否申報該部及該督撫按查究。如果申報。因何不行題叅。如未經申報。卽係通同欺隱。請旨革職。立行拏問。以爲溺職誤國之戒。再照

各司府。凡遇動用錢糧辦解物料等項。應立循環文簿。查驗完欠。嚴防侵匿。該部會否照例通行。如此延捱過限。及官解侵費者。有無叅治。此項之外。果否再無別欠。併乞敕下該部。速行回奏。庶錢糧有綱領。而奸貪知法度矣。謹題請旨。奉聖旨。劉漢祚著議處具奏。該部知道。

又

刑科左給事中臣魏象樞謹題。爲欽件之稽察無法。內外之推諉易生。仰遵明旨。再進芻言事。臣聞君職要。臣職詳。古來致治之道也。近者皇上以策勵擔當諭諸臣。而諸臣卽以清理欽件爲首務。從此內外同心。庶不負聖明圖治至意。臣竊謂事久則弊生。始勤而終怠。稽察之法不立。非所以戒將來也。臣查曩來覆奏本章。凡係內外咨覆。行催申報者。俱不詳開年月日期。卽重大欽件。亦用隨移。屢催已經。今准等語。含糊具奏。或部院延遲。或撫按耽誤。查者無月日之可稽。言者無衙門之可指。夤緣之資。推諉之心。俱從此生。非法之善也。況事有宜詳。行查每至數次。情有未確。批駁不厭再三。與其爲法受過。致生沈閣之疑。何不據事直書。以見詳慎之意乎。今大政維新。諸弊盡革。恭請自今爲始。凡各衙門一切事件。內外行咨。察究題覆者。其本內務將某月某日行咨。某月某日咨催。某月某日咨回。某月某日再駁。某月某日說堂。在外衙門。某月某日接咨。某月某日回咨。某月某日查究申報。某月某日批駁允詳。及事在赦前赦後年月字樣。各開寫明白具奏。其事情有無違誤。耽延是何衙門。我皇上一電覽而知之。文甚簡而法甚詳也。下而部院遵督催之旨。六科嚴註銷之規。臺臣盡刷卷之職。徇庇扶同者。各治以罪。皇上握其要。諸臣任

其詳。則推諉蒙蔽之患清。而精明惇大之治成矣。抑臣更有進者。臣繹上傳。所謂策勵擔當。非僅在遲速。聞望諸臣也。近見督撫按有不敢輕議之事。應候部臣裁定。而部臣殊不肯決。部臣有不能遙度之事。應行在外酌處。而在外亦不肯任。內外活局。往返游移。累月經年。無一成議。其於朝廷之大事。地方之急務。不知廢弛幾何矣。今後內外諸臣。有實因公忠起見。不係懷私者。而部議勿咎其多事。有實從職業陳言。事關大務者。而旨下立見之施行。庶策勵擔當。各出心力。無愧忠勤。伏乞天語嚴飭。所關治道匪小也。謹題請旨。奉聖旨。這本說的是。著嚴飭行。該部知道。

又

刑科左給事中臣魏象樞謹題。爲錢糧關國家大務。清核爲今日先圖。謹陳積弊之由。請立革弊之法事。臣於本年五月初一日。具有直糾溺職藩司一疏。已蒙聖鑒。可以無言。但因是而思及國計民生之大。尙有法當立而弊當革者。再爲我皇上陳之。錢糧經制。原有定額。州縣之徵收。必遵布政之則例。有一項則徵一項。完一分則報一分。考成之法具在也。如蘇松常三府。自順治四年起。實徵完額布銀五十餘萬。戶部現查布政司報部文冊。累年俱報未完。徵者全徵。報者虛報。外欺撫按。內欺部臣之弊。莫此爲大。且匿銀已經五載。不聞有發覺解官之人。欠布已累萬千。不聞有考奏未完之疏。則前日稽察之不周。概可見矣。今由一省而類推之。臣恐各直省報辦未辦。報解未解之本折。不止額布一項也。雖日久事發。追比難寬。或官去役逃。而金錢不可復返。病在國矣。或牽房扯債。而包賠累及無辜。病在民矣。朝廷抑何樂於懸

不結之局。貽不了之害乎。臣請以兩言蔽之曰。追比於事後。不如稽查於事前也。夫完報有限。查銷有法。載在會典甚明。一則頒發格眼文簿。按月開填徵完起解錢糧數目。每歲終該州縣赴府。該府赴布政司查比。仍將查比過錢糧分數另填一格。具由呈部查考。以防貪官私徵欺隱等弊。一則做立循環文簿。各省登報辦解物料數目。年月姓名。各照道里遠近。按期倒換。照例查驗。到者填註。遲者拏究。以防解役延捱侵匿等弊。稽查之法一立。若仍有五年不報。五年不解之本折。臣不信也。況法有未善。作何變通。事有難行。作何調劑。又在內外諸臣。長慮熟籌。以副上傳內因革損益何事宜先之意。至有累年拖欠錢糧物料。果否在官在民。有無未報未解。如按臣秦世禎所云。上下相蒙。新舊互掩等弊。應敕各該撫按。逐項清核。立行叅奏。無致久飽奸貪。虧損國賦可也。如果臣言不謬。伏乞聖明。敕下該部。確議速奏施行。謹題請旨。奉聖旨。該部議奏。

又

刑科左給事中臣魏象樞謹題。爲直陳格天之圖。祈定立國之本。以保萬年久安長治事。臣聞自古帝王。有治天下之本。曰紀綱法度。有教天下之本。曰禮義廉恥。所以相統相維。不致生悖生亂。自我皇上親政之年。諸凡昭明紀綱。修舉法度。謹飭禮義。激勵廉恥等事。奉有上傳旨意四十餘道。上以宏祖宗之德。下以治臣庶之心。事事實行。治平立見。頃者水旱爲災。星月告變。臣同官業有克謹天戒之請。曷敢復贅乎。臣竊考傳記所載。大抵反常者卽爲變。今日天地之變。乃人事之反常所致也。臣略舉一二政事之未善。

人心之有違者。直陳於聖明之前可乎。夫臣子之遵奉聖旨。其常也。而近日之顛倒旨意。輕重綸言。則變矣。如臺臣婁應奎。因見投充之人。真假莫辨。具疏請發部冊。奉有投充部冊。著作速發該管州縣之旨。部臣合議魚鷹等戶。而發冊一項。未蒙上命中止。徑議不必頒發。置明旨於何地乎。又云。一身指稱二三名。發冊恐致混擾。既知二三其名。何無請旨禁革。以致指稱滋弊者。誰之咎耶。且各衙門議事。有皇上之所謂大有關者。而臣下以爲無所關也。皇上之所謂速且詳者。而臣下未必速且詳也。臣之所謂反常者。此類是也。又如朝廷職官。治朝廷之軍民。其常也。而近日之責拘投人。罪坐職官。則變矣。八年七月內。上傳云。今後各該地方官。如遇投充之人犯罪。與屬民一體從公究治。天語煌煌。忽焉反汗。變法以後。降革不一。視朝廷選授之官。反輕於各旗新投之人。夫信者。國之大寶也。國不示信。使有司重足。百姓吞聲。畿輔之地。滿漢讐訟。耕鑿不安。臣之所謂反常者。此類是也。又如按臣代天巡狩。察吏安民。興利除害。其常也。而近日之劣官反噬。甲喇路辱。則變矣。夫御史欽承簡命。叅賊擊吏。必採訪輿論。諮詢道廳。會同督撫。而後疏聞。今有已經叅問。下水拖人。報怨尋仇。違法干禁。撫按之白簡無靈。則刁風日長。貪官益肆矣。至有以橫侮相加。被拽出輿入告者。君命已辱。復令覲顏官民之上。其何以正體統而尊天子也。儻今後巡方畏屬員如狼虎。文官與武官爲異途。各有互相凌抗之意。國家大事。必不能濟。臣之所謂反常者。此類是也。不特此也。人材用舍之權在朝廷。而紛瀆之言。動干闕下。錢糧敲扑之苦。在百姓。而中飽之弊。疊見奏章。甚至清禁之內。一月而冤斃者兩人。何不愛旦夕之命。以作太平之民。司寇之堂。一事而刑責者三百。

果否得首從之情。以絕株連之怨。事之反常既多。天之示變不偶。感應之理。明明若符。臣言官也。苟有諱而不言。言而無據者。均爲溺職。以負我皇上。臣不敢也。伏乞特召滿漢大小九卿科道諸臣。面詢政事之得失。民生之疾苦。某應改正。某應禁飭。親政來上傳詔旨。某事實行。某事未行。務令盡言無隱。果有關於紀綱法度。禮義廉恥。上合天意。下合民心者。立採而施行之。憂勤惕厲。勿事虛文。滌慮洗心。正告天下。庶萬年之治安有本。上天之仁愛可通矣。疏字逾額。聖鑒施行。臣不勝戰慄之至。謹題請旨。奉聖旨。據奏變更上傳。輕重綸音。事情重大。著院部等衙門。滿漢堂上官。併六科都給事中。河南等掌道御史。確議具奏。親政以來。上傳諭旨。著內院彙寫進覽。仍刊發各衙門。著實遵行。該衙門知道。

又

刑科左給事中臣魏象樞謹題。爲詳奏事情月日姓名。以便確議事。臣於本月十五日。具有直陳格天之圖等事一疏。十六日。奉聖旨。據奏變更上傳。輕重綸音。事情重大。著院部等衙門。滿漢堂上官。併六科都給事中。河南等掌道御史。確議具奏。親政以來。上傳諭旨。著內院彙寫進覽。仍刊發各衙門。著實遵行。該衙門知道。欽此。欽遵。臣捧誦天言。仰見我皇上敬天愛民。勵精圖治。首在信上傳而重綸音。特令院部等滿漢大臣。併科道言官。確議也。但臣係左給事中。不在議事之列。而事情之日月姓名。前疏字簡詞慎。開寫尙有未詳。謹補牘奏明。俾諸臣悉顛末。以報明命。臣心盡矣。夫違旨不發部冊者。戶部事也。臺臣婁應奎疏。於五月二十七日。奉有作速頒發之旨。戶部於七月十五日始覆。不必頒發之議。此其一也。別事兩

議請裁。此事徑駁明旨。此其二也。既云查照姓名相符。又云查投充人戶。每有一身而指稱二三名者。查出者必有地方。每有者係何姓名。指稱二三名者是何情弊。何無奏聞。此其三也。臺臣亦係舊人。由縣令考選。奏云無冊可考。真假莫辨。部臣議云。今若再發。惟恐假冒姓名。所見異同。可以面問。此其四也。臺臣疏云。有將未投田地。開入已收名下。及強帶他人。開除錢糧。躲避差徭等弊。部臣議云。照本身所有地土。豁免差糧。給牌行各該州縣存照。夫州縣既存部牌。年來何無行令。照牌造冊。申送撫按。具本奏聞。一以核地土錢糧之缺。一以杜爭訟解審之擾。此其五也。臣所謂顛倒旨意。輕重綸言者。非無據也。變上傳請處職官者。亦戶部事也。夫投充之人。一體究治。戶部奉敕。在八年七月初一日也。今年四月以後。處過道府州縣等官。張自昌等八員。臺臣王道新具疏已詳。迄今未覆。若叅處昌平道張自昌者。原因投人李進德、馬成福等。戶部則變上傳而蒙奏。吏部則引上傳而薄罰。違悖顯然。此其一也。戶部差愛惜喇庫哈方、鄭庫納。查得該道提李進德行夾。似有吏部查明行夾不真。兩疏矛盾。明有欺罔。此其二也。馬成福事。係戶部告詞批發。該道審明退地。於去年七月內詳允依議。又刑部問明戶部行文發落。撫臣原咨具在也。佔地既經詳允。板責豈是非刑。且吏部查係赦前。戶部不查緣由。輒行叅奏。此其三也。莊頭解部。固爲舊例。投人冒稱。何以辨別。既貪官之勒索。指據無聞。問叅處之重輕。果否允當。此其四也。臣所謂變法以後。降革不一。視朝廷選授之官。反輕於新投之人者。非無據也。至於本年四月二十九日。刑部尙書劉餘祐。具有聖心圖治維殷等事一疏。聖旨覽奏。有關圖治大務。著酌確議奏。該部院知道。今及半載。未見恪遵。

是臣下以爲無所關者。明矣。恩詔內封贈官員一款。著作速舉行。迄今內外懸望。又報奏冤枉一款。著詳開緣由。迄今入告幾人。是臣下未必速且詳者。又明矣。臣謹將聖旨以爲重大者。開奏上聞。臣於公議之日。或應在天安門外聽候傳問。或允臣同在議事之末。一一詳悉講明。恭請明旨遵行。非微臣所敢擅便也。疏字逾額。貼黃難盡。統乞聖鑒施行。謹題請旨。奉聖旨。著一併會議具奏。魏象樞准同六科都給事中來。該部知道。

寒松堂集卷二

奏疏

吏科 詹事府 光祿寺

吏科都給事中臣魏象樞謹題。爲恭陳用人第一大政。以佐治平之實效。以報一體之隆恩事。臣惟上行下濟。大易著泰交之文。君明臣良。尙書廣喜起之盛。歷漢唐宋元而上。一心一德。相得益章。史冊中蓋不多見也。昨逢元旦。傳奉溫綸。召內三院。引九卿。詹事府。國子監。都給事中。掌道御史等官。特宴於保和殿。臣適以青瑣末員。遭逢異數。問地問年。躬承天語。賜餽賜飲。喜動龍顏。都俞一堂。賡歌千載。嗣於初三日。接滿漢官參同奏事之上傳。又於初四日。捧言官條奏多係細務之聖諭。仰見我皇上愛人知人。洵與堯舜同揆矣。臣竊思國家第一大政。莫大於用人。但上天之生才有數。全恃皇上培植而辨論之。以待一日之用。故用之有效也。語云。十年之計樹木。百年之計樹人。今滿臣甫停戰伐。講求治平。非厚加培植。則舊人有零落之憂。漢臣參同奏事。顧問方殷。因事察人。辨論於蚤。儻異日部院有缺。皇上預知某臣之心地精明。堪進何職。某臣之事務熟鍊。堪進何職。某臣之厚重少文。堪進何職。某臣之風裁出衆。堪進何職。參以衆議。簡在帝心。社稷所關。得人不偶。非資序之淺深可拘也。若總督撫按。均係重臣。但總督封疆之任。與撫臣兼吏治民生者不同。近日總督於京堂舊人及在外巡撫提督中推用是矣。獨巡撫缺出。推京堂

者少而推布按者多。臣有兩說於此。巡撫固需歷練之才。京堂亦是切要之地。若盡推外任。誰辦部院之事。布按既儲爲巡撫之用。自宜選材而授。苟錢穀有玷而居方伯。律例不明居臬憲。職任尙且難堪。節鉞必無厚望。臣請皇上察新舊按臣中。真才真品。有守有爲。果能興利除害。不愧察吏安民者。或三差俱完。或兩差無疵。書名御屏。命廷臣一例同推巡撫。苟可得人。何惜不次之擢。至於布按二司有缺。吏部仍照會典舊例。推列正陪。請旨點用。可爲今日之布按。方可爲異日之巡撫。臣所謂培植而辨論之者。不獨爲一事言矣。內外得人。同心奏效。治平之本。莫大於此。伏乞聖明採擇施行。謹題請旨。奉聖旨。著確議具奏。該部院知道。

又

吏科都給事中臣魏象樞謹題。爲卓異之名實易淆。聖朝之拔擢貴慎。謹陳愚見。以錄真才。以佐澄清事。竊惟三年計吏。名曰考績。蓋考察政績之成與不成。以行朝廷黜陟之大法也。臣濫隨各衙門閱冊之後。得與滿漢諸臣同心叅核。事必求其實。法必求其平。竊愧於皇上黜幽之大典。不能仰副萬一。敢言陟明乎。臣查舊例。各撫按爰有卓異之舉。大抵於道府州縣中。拔其品行卓越。政績異常者。舉數人以報天子。獎賞紀擢。我朝行之至再矣。臣詳考其義。今之所謂卓異。卽漢之所謂治行第一也。不懸天下非常之格。不能得天下非常之士。朱邑爲北海太守。以廉平不苛。愛利爲行。入爲大司農。卓茂爲密邑令。以教化大行道不拾遺。遷京部丞。黃霸爲潁川太守。以先教後罰。姦盜屏徙。徵爲京兆尹。召信臣爲南陽太守。以訓

農興利戶口倍增召爲少府史書所載指不勝屈古之視吏治也其重如此我皇上大政方新首舉廉卓鼓舞激勵正在於斯且萬幾日御諸務親裁此事三年一舉豈尋常薦剡可比上而朝廷著得人之令下而部院盡知人之明卓求真卓必有賢聲異求真異必有實政今查各直省冊開卓異官員事實有據者固多平常無奇者不少雖赫赫之名見於久去而泛泛之譽豈是定評卓異之選誠未可以濫邀也臣請敕下部院將舉到卓異官員所開事蹟逐字推敲嚴加品題以實政可指功績超衆者分爲一等以治業平常僅能稱職者分爲一等其姓名事實俱用滿漢兼字開進審覽御筆親定獎賞之後各照實蹟分別優擢勿使旣膺循卓之典仍滯常格之中舉一真才而天下之才皆勸擢一廉吏而天下之吏皆服庶見國家磨勵人才務求實用吏治民生良有裨益卽兩漢盛事不能專美於前矣謹題請旨奉聖旨這所奏卓異官必確求真才實用有裨吏治著卽嚴核行該部院知道

又

吏科都給事中臣魏象樞謹題爲糾拾關朝覲大典旣明必不敢廢之職掌當去必不可仍之弊端恭請敕議良法永爲遵守事竊照三年大計冊報責在撫按考察責在部院糾拾責在科道總爲仰佐重典以澄清天下之吏治也臣查四年科道拾遺曾經舉行因立法不善科道被處者不一而足卽臣衙門如劉樾以糾拾張守廉責革楊時化以糾拾左光先降級劉鴻儒以糾拾勞有學降級林起龍以糾拾楊雲鶴革職楊璜以糾拾劉孔敏罰俸而臺臣尙不與焉臣考之典章原用科道以彈劾有司非惜有司以處分

科道也。又因撫按之耳目有遺。廣之科道。非因科道之糾拾有據。遂咎撫按也。乃科道以進言受累者。弊有數端。大約糾拾之單款。與撫按冊報相左。故撫按恐蹈徇縱之愆。不得不代尋出脫之法。以故巧爲遮蓋。款款子虛。甚有看語內比之文王孔子者。此一弊也。又所糾之官。不行革職。仍以見任質審。百姓衙役。尙屬管轄。斷無供証贓私之理。此二弊也。會典所載。科道官必待吏部考察後。有失當方許指名糾劾。竝無處分科道一字。而降革責罰。反坐言官。不合典例。此三弊也。且當日察審單款之無據者。撫按也。乃案墨未乾。而所叅左光先等貪婪不法。革職提問者。亦撫按也。豈廉於前而貪於後乎。抑初甚賢而繼不肖乎。則科臣之指叅非誣。撫按之解脫益明矣。總因四年計典初舉。皇上未親大政。公道未章。事多草率。今值聖政方新之時。從前弊端不除。則諸臣職掌不盡。諸臣職掌不盡。則墨官遺漏必多。况諮訪既奉有不行之旨。拾遺一節。尤爲緊要。不可不力爲舉行者。臣查得四年銓部所陳計典一疏。內開我朝鼎新創舉。一應考察事宜。且照舊例舉行一次。儻其中有應革應因者。再行斟酌。今若不遵舊典而革前弊。不足以立萬世之良法也。至於被糾官員。或本身有賊。或衙役有賊。或才調庸常。或性情乖戾。自應照例處分議罪外。如果審無賊過。應否還職。竝聽部議。自不得藉端誣罔。處分科道。以負皇上求言察吏之意。卽科道諸臣。自盡厥職。倍加公愼。無敢有畏罪塞責之心。庶大典有光而貪風可息矣。臣繕疏已畢。見掌道臣朱鼎延請復拾遺之例。微臣竝指四年拾遺之弊。伏乞敕下部院。一併確議。永爲遵守施行。謹題請旨。奉聖旨。據奏四年糾拾反坐言官有壞吏治塞言路。以後科道糾拾官員。照大計一例處分。科道官有挾私妄

糾的。著吏部都察院指實叅奏。該部院知道。

又

吏科都給事中臣魏象樞謹題。爲明計典以清吏治。復舊治以肅人心。謹獻芻言。仰佐新政事。臣惟人君御世之權。莫大於賞善罰惡。國家察吏之典。不外乎黜幽陟明。故虞廷考三載之績。周官垂六計之法。典甚重也。我朝兩次展覲。方在定鼎之初。進退固嚴。規制未備。雖抒萬國拜舞之心。猶缺御前考察之事。今值皇上躬親大政。首舉計典。明一代之令甲。所以立萬禩之章程。大非從前草創可比者。臣爰考舊章。切思三年朝覲。義取述職。其名爲大計者。乃天子自計天下官員之賢否。令部院科道諸臣分理而共佐者也。卽如御前有奏。大班有劾。總職者有免冠之責。復任者有戒飭之敕。廉能超衆。則面加獎賞。地方利弊。則各許奏陳。載在會典。班班可按。前此皆未行之。今若嚴愼之心有加。澄清之效益著。苟令入覲諸臣。不聆天言之赫奕。尤非所以勸懲天下也。臣謂鱗集闕下者。布按二司。實爲百官綱領。兩司稱職。則道府州縣可知也。恭請皇上。面召各直省兩司等官。問水旱頻仍。有無救濟招徠。所報地荒丁逃者。誰爲致之。問錢糧混冒。官侵吏肥。每至數百餘萬者。誰爲掌之。問劣員誣課蠹國。久列優評者。誰爲縱之。問款項混開。徵解淆亂。賦役全書。屢飭不定者。誰爲司之。問地方有藐法行私。縱賊窩盜。罪害及於職官百姓者。誰爲制之。問法律不明。任情出入人罪者。誰爲議之。問欽案沈閣。久不完結者。誰爲諉之。問奸蠹盜折官糧。成千成萬。弊由夤謀濫委者。誰爲主之。凡三年中國賦之盈縮。民命之生死。官評吏議之是非公私。關係大

綱者。逐一面奏。稱職者。作何獎賞。不稱職者。作何處分。庶足爲表率百僚之戒。儻有支吾欺飾。容科道官以白簡隨之。款款糾駁。以服其心。俾郡邑小吏。咫尺天威。惕然於雷霆雨露之下。自返職業。圖報朝廷。仰見盛世之計典昭明。海內之人心鼓勵。卽千萬世永爲遵奉矣。臣蒙聖恩。補列首垣。在吏言吏。伏候特旨。乾斷施行。謹題請旨。奉聖旨。著速議具奏。該部院知道。

又

吏科都給事中臣魏象樞謹題。爲體聖主難愼之心。謬獻條陳。仰祈採擇事。臣待罪吏垣。屢讀明旨。惓惓以察吏用人爲重。臣雖愚昧寡識。不諳銓政。聊就明旨。一推廣言之。一讀聖旨云。地方好官。若不薦舉。上何由知。以後各督撫薦舉。俱著遵奉前旨。是舉劾之責。督撫所不能辭矣。夫督撫止有歲終甄別之例。向來直省等處。有循而行之者。陝西等處。有久而未行者。北直山西等處。有止及道府者。宜大等處。有兼及有司者。均是督撫而各持一例。於法不可。皇上方欲澄清吏治。自司道以下。佐貳教官以上。或通行甄別。或另行舉劾。早宜敕定。勿致參差。以後務將司道府廳。原開考語。全列疏中。部院科道。訪有不當者。以便指名駁叅。庶是非毀譽。罔敢欺朦矣。伏候聖裁。一外官陞轉。挨俸論薦。部臣極其詳愼。臣常慮俸薦備者。錢糧未必盡完。錢糧完者。俸薦未必全備。况今薦額日嚴。薦牘日少。從前之有薦者。尙可按陞。此後之應陞者。何爲確據。今應將給由考滿事例。遵照前旨。著實舉行。考任內之實蹟。去紙上之虛文。操守政事。既可確見其短長。稱職平常。亦可分別而陞敘。前經題明。以皇上親政之年爲始。歷俸三年。依例考滿。但錢

糧隨俸計算或截算八年以後之俸。或通算八年以前之俸。議定畫一通。敕各督撫轉行所屬。應與給由者。不許蒙隱扶同。亦不許留難稽滯。本冊文移。各註申考。駁察月日。旨下該衙門。會同磨勘。次第覈覆。至布按二司。一爲錢糧之統匯。一爲刑名之大綱。尤當嚴覈。以正本原。庶互保同結。非爲故事矣。伏候聖裁。一讀聖旨云。若用卓異。必須在京堂上官有保結的。方許推用。仰見皇上愛惜人才之心。欲盡謂之賢。既恐以人而冒盛典。欲盡謂之不肖。又恐以盛典而棄人。臣思聞見親切。莫如本管上司。萬一京堂之風聞。不敢輕保。則蘇松之缺。難以久懸。卓異之官。難以概棄。此際何所適從乎。夫用人之道。慎終不如慎始。卓異三年一舉。原從千百人中。覈其才守。拔其二三。較循例之薦舉。何其重也。向來撫按止以一冊開報。全不具疏題奏。才守實蹟。何嘗上聞。卽連保之法。未經題明者。臣亦不敢苛論。今後督撫遇大計之年。務將卓異官姓名實蹟。會疏特舉。不必沿冊報之陋規。所舉當則與卓異同其賞。所舉不當。則併道府同其罪。庶信賞必罰。可期得人矣。伏候聖裁。以上三款。如有一二可採。伏乞敕部確議。上請施行。條奏字數溢額。併乞聖明鑒宥。謹題請旨。奉聖旨。該部確議具奏。

又

吏科都給事中臣魏象樞謹題。爲微臣就職言職。以明職業。以求實濟事。竊惟懸輅設鐸。帝王之盛心。補闕拾遺。臣子之大義。古來上有明主。下有直臣。或旌讜論於當時。或表忠言於事後。美蹟彰彰。載在史冊。近者綸音再下。省躬求言。令諸臣各抒所見。一諭曰。曠廢職業。又諭曰。無濟實事。臣循分自省。言責大虧。

稍有良心。能無汗愧。此時若不明其職業。而求其實蹟。則諸臣愈負皇上納諫之心。皇上亦無從收諸臣建白之效。誠如上傳所謂當言不言。不當言而言者也。臣竊思言官以進言爲職。皇上以開言路爲心。向來言有可行者。皇上未嘗不採其言。言有不可行者。皇上亦未嘗重棄其人。所以滿漢之臣。大作敢言之氣。近日見有一言不當。而問擬大辟者。律以人臣之道。重君父原不重身家。計蒼生原不計禍福。但恐言路諸臣。明知言者得罪。不言者無罪。各懷顧忌。甘自類於寒蟬。委是鋪張。尙欲託於鳴鳳。以惴惴畏罪之心。結成鬱鬱絨口之象。亦言路之大可羞也。夫人臣之罪。洵莫大於懷偏私。重賄賂。若一言不當。而可擬重辟。何以處臣下之貪賊壞法。報怨挾仇者乎。臣謂盛世之法。貴持其平。良臣之言。務求其實。古人有云。爲治不在多言。顧力行何如耳。糾彈勿避要津。大惡大貪。劾一人而已。見風節。條陳不取累牘。大利大害。舉一事而尤勝雷同。其有立意含糊。屬辭枝蔓。言之則利多而害少。行之則利少而害多。此不職之臣也。明旨批下吏部。以考功之法處之。如係坐而言起而可行之事。內外務在實行。大小各有實濟。部臣旣勞之於始。皇上仍課之於終。孰敢苟掇浮議。漫草彈章。以自取溺職之咎耶。今後臣衙門。仰體聖懷。參考舊例。以進言之有濟無濟。見言官之有才無才。其應內外遷轉者。兼查職業。明咨吏部。此外果有貪賊壞法。報怨挾仇等弊。或本衙門互相察舉。或該部院特疏糾劾。情弊昭彰。供證明白。此不法之臣也。明旨批下刑部。以司寇之法罪之。法歸於平。言歸於實。凡語過戇而心無私者。不必概送刑部。從此上以實求。下以實應。不但沽名釣譽者。各見其忠良。卽持祿養交者。亦生其志氣。用言與用人俱效。小利合大利兼收。法

紀當而職業明。其所裨於聖治者。匪淺鮮矣。謹題請旨。奉聖旨。覽這本內云。人臣之道。重君父原不重身家。又云。懷偏私。重賄賂。報怨挾仇者。何以處之等語。所指何人。著魏象樞據實詳明奏來。該部知道。

又

吏科都給事中臣魏象樞謹題。爲遵旨奏明事。臣於本月初一日。具有微臣就職言職。以明職業。以求實濟一疏。初二日。奉聖旨。覽這本內云。人臣之道。重君父原不重身家。又云。懷偏私。重賄賂。報怨挾仇者。何以處之等語。所指何人。著魏象樞據實詳明奏來。該部知道。臣捧讀天語。仰見我皇上俯採芻蕘。雖條奏本章。亦必字字求實。堯舜之心。不是過矣。臣疏所奏。原因四月十七日。接得上傳內有當言不言。不當言而言。無濟於實事之諭。臣竊思言官有何實事可報皇上。不過進言得當耳。前日言官吳達吳拜。因進言不當。俱擬死罪。臣敢言之才。不及二臣。尸位素餐。實深恐懼。今見我皇上省躬改過。責望直臣。臣所以言人臣之道。重君父原不重身家等語。蓋欲人臣披肝瀝膽。以事一人。甯可因言而得罪。不可畏罪而廢言。古人云。怕死非忠臣。臣以此自勉。併以勉言路諸臣。實無所指也。又因上傳內有大小臣工。懷偏私。重賄賂。不實心爲國。曠廢職業之諭。臣竊思言官何爲職業。不愧朝廷之耳目。是其職業也。言官而懷偏私。何以糾報怨挾仇之人。言官而受賄賂。何以察貪賊壞法之事。如有此等。所犯大爲不法。當下刑部議罪。若進言不當。特不稱其職耳。亦下刑部議罪。法之輕重。未得其平也。且皇上爲諸臣之父母。父母因不孝而欲議殺其子者有之。未有因失言而欲議殺者。臣所以言人臣之罪。洵莫大於懷偏私。重賄賂。報怨挾仇。

者何以處之等語。蓋謂皇上既下求言之諭。今後凡有不法者。應下刑部議罪。其不職者。止下吏部處分。定爲良法。昭示臣工。言路通塞之大關。史書紀載之美事。莫切於此。臣如有所指之人。真見真聞。卽特疏入告矣。豈敢待皇上詰問而後指名。况臣原疏中。明有立意含糊。屬辭枝蔓之戒。臣欲戒人而先不自戒。臣罪滋大。臣斷不敢也。謹據實詳明回奏。伏候聖明鑒察。貼黃難盡。併乞慈宥施行。臣不勝戰慄待命之至。謹題請旨。奉聖旨。魏象樞所奏情詞。已知道了。以後言官進言。凡有實據的。都要明白指奏。何必分別小臣大臣。含糊影射。著通飭行。該部知道。

又

吏科都給事中臣魏象樞謹題。爲奏明臣未畫題緣由事。本月初一日。吏部聚集九卿科道。會推南贛巡撫。正推者。乃江南左布政使劉漢祚也。滿漢諸臣。爲地擇人。自有所取。但臣曾因錢糧一事。具疏題叅。前後不便互異。是以未敢畫題。理合奏明。伏乞聖鑒施行。謹題請旨。奉聖旨。知道了。該部知道。

又

吏科都給事中臣魏象樞謹題。爲申未明之職掌。以廣聖恩。以佐銓政事。臣新任吏垣。查憑限一節。屬在職掌。例之所有。臣固不敢濫爲更張。若使地方不獲人材之益。人材先受地方之過。亦臣之所爲忤忤懼也。謹列四款。爲我皇上陳之一官員領憑。臣科定限。向來滿漢同理。止用漢字。查近日各衙門行移。俱用滿漢兼字。文憑重事。何獨不然。臣謂今後部科。使用滿漢字定。可掛號以防假僞。一憑限日期。查照官制。

每日以六十里爲定。恐有規避。仍立法繩之。今處分之法。部臣已從寬矣。各官願叨一命之榮。肯有遲遲之意。但水陸間關之中。或風濤有阻。或盜賊無常。或資斧告艱。或僕馬多故。或便道辭親。或攜家就養。萬一迂遲。難免降罰。况難職無級可降。卽行革職。俾地方終不得一官之用者。臣科之咎也。臣謂處分之法。自宜照例而定限之期。不妨稍寬。今擬知縣以上。每應限一月者。宜量展十日。其佐貳首領教職驛巡大使等官。出身寒微。行李蕭然。策蹇而行者有之。徒步而往者有之。艱苦與道府州縣不同。責任亦與道府州縣不同。每應限一月者。亦量展十五日。儻仍有逾限淹留。託故告改者。臣當以白簡從事。情法旣已允協。民社亦無久誤。前吏部因教官寒苦。移會臣科。頗有同心。皆仰體聖恩。以示寬大。一領憑官員。遵限赴任。實爲地方之益。臣科滿漢官於本月初一日。畫憑有湖廣會同等縣知縣孫如周等。呈稟地方現在用兵。尙苦無任可到。討寬限期等語。臣思王師遠征。蕩平立奏。印官不到。誰人料理。如果恢剿未及。伏莽未靖。數千里外。臣亦不能遙度而概寬也。今後凡遇用兵地方。許令部選官員。到省驗憑。投見撫按。具疏題明。以該地方平安之日。催令赴任。緩急遲速。一聽撫按限之。竊念從前有有用之材。或違限而斥。或遇賊而死。負朝廷之培植。勞部臣之銓除者。不知凡幾。誰爲雪之。誰爲卹之哉。臣讀聖諭有曰。國家愛惜牧民之官。夫愛惜而不肯輕用。必愛惜而不肯輕棄。應敕各督撫按。如有未定地方。一體遵奉。以重人材。一難職官員。舊例內外各衙門吏農考滿。部科查對。然後選授給憑。惟恐易於假冒。近見吏部有查拏假官一疏。內具假憑四張。部科印信俱係私造。雖奸膽包天。無所不爲。皆因撫按報缺稽遲。部臣無由察核。故久假

而不歸也。今後凡雜職員缺，毋拘揭報之例，定須每季詳察，具疏奏報。內外互稽，題題自遁。且臣閱大計冊中，各省缺員十之六七，內有假官註考者，有同名竝到者，有攜印脫逃者，有議缺當裁者，臣曾與考功按冊面講，部臣自行嚴查外，其現缺若干，宜刻期速補，以絕奸弊。以上四款，皆就臣職掌之一節而推言之。其於人材地方，果否有裨。聖恩銓政，果否無礙，伏乞敕下吏部，確議速覆。臣科以便遵奉施行，謹題請旨。奉聖旨，著確議具奏。吏部知道。

又

吏科都給事中臣魏象樞謹題。爲督撫關係封疆，告病例當代請，伏乞明旨申飭，免致貽誤地方事。臣惟國家之務，莫大於封疆。封疆之任，莫重於督撫。蓋糧餉兵民，安危治亂之大綱繫焉。文移一日不理，則案牘遲壅，耳目一處不周，則弊端叢積。無病而控辭，非臣子之義也。有病而臥理，亦非地方之福也。臣見向來撫臣告病，如趙兆麟、劉武元、周文燁等，俱係自疏陳奏。奉旨以後，必須具題行查，再題再覆，而後出缺。推補在部臣固爲慎重，但一查非數月不能結局，一推非數月不能履任。以多事之封疆，姑託抱病之節鉞，於地方殊有未便也。況今刑名吏治，歸併料理，事務更煩，責任倍重。有病之人，精神必減，卽事事周密，保無一事之疏虞。念念擔承，保無一念之旁貸乎。臣於此不能不鯁鯁過慮也。查會典內所載，各邊督撫患病，不許自奏，聽巡按御史勘明轉奏。今巡按已經止息，合無督臣有病，許撫臣勘明代奏。撫臣有病，許督臣勘明代奏。無論邊省，通爲定例，應留應去，取自上裁。既不致月復一月之耽延，竝不煩一疏再疏之

紛擾封疆事重。庶無萬一之誤也。至於方面等官。表率屬僚。實爲緊要。儻有病廢不堪者。該督撫照例查奏。若姑容戀棧。部院科道訪實指叅。重治督撫之咎。所裨地方匪渺小矣。臣在吏言吏。伏乞聖明採擇施行。謹題請旨。奉聖旨。該部察例具奏。

又

吏科都給事中臣魏象樞謹題。爲部司擅委中軍。大乖典制。請重處以儆將來事。竊照私委之弊。害民蠹國。我皇上禁革甚嚴。卽地方額員有缺。例於部選職官中選委。未聞部司設有中軍私牌。擅自委用。如主事錢受祺者。則大可異也。查中軍一官。原爲傳宣軍令。參贊兵機而設。兼有分統標下兵馬之任。所以督撫兵巡等衙門。非部推中軍不敢用。雖其愛功名而奉約束。而不肖之生事害人者。尙比比入告也。今受祺一奉差主事耳。旣無傳宣之軍令。又無參贊之兵機。一兵一馬。毫無干涉。私委中軍。意欲何爲。非藉爲剝官之爪牙。卽用爲通路之線索。此不問而可思者。但受祺與吳玉臣。未委之先。因何知識。給牌之際。憑何勞績。旣委之後。盡何職業。在差之日。駐何衙門。臣實不能爲受祺解。案查各差私收入役。上傳有禁。且柳寅東以撫臣而輕用一弁。曩會重處之。受祺抑何膽大如斗。而毫無顧忌也。前吏部候三法司題覆再議。今三法司俱經核實奏明矣。伏乞敕下吏部。嚴究根由。有無賄託。重加處分。以爲後日招納奸徒剝軍害商之戒。今後各部考核司官。及各督撫查核道將。凡有濫委縱害情弊者。定從劣考。統惟聖明嚴飭施行。謹題請旨。奉聖旨。部司擅委中軍。殊屬違例。錢受祺著議奏。該部知道。

又

吏科都給事中臣魏象樞謹題。爲檢舉錯誤事。臣於本月初八日。具有部司擅委中軍一疏。昨臣在科查發外抄。見三法司核覆疏內。俱云錢受祺私委捕官。臣疏將捕官二字。誤寫中軍。自知粗疏。理合檢舉。請旨改正。仰乞聖明鑒宥施行。謹具奏聞。奉聖旨。叅疏原當詳慎。捕官中軍。輕重有別。魏象樞何得誤寫。著議奏。該部知道。

又

吏科都給事中臣魏象樞謹題。爲詳奏臣科始末。仰乞聖鑒。併陳科臣挾恨之情。以明國法事。臣於本月二十一日。在科辦事。見臣同官陳調元叅臣一疏。奉聖旨。這本內事情。著吏部都察院詳察確議具奏。欽此。臣自當靜聽察議。但臣科始末。不敢不仰陳於皇上之前。查臣科左給事中杜篤祐。於六月初一日。吏部覆准。奉旨給假六箇月。本內無開缺另補字樣。及六月十五日。吏部題覆陳調元疏看語內。引會典題放事例。凡給假官。應照例作缺。竝無姚文然杜篤祐姓名。及科臣爲始等語。滿洲臣與臣細釋。凡之一字。未知果否兼前後而言。兢兢詳慎。恐與調元原疏不侔。隨令他赤哈哈方常書到部問明。杜篤祐是出缺。不是。吏部回說以後的出缺。杜篤祐不出缺。而調元捏臣科爲立志背旨。非妄言乎。臣科於閏六月初八日。因咨劉樾等陞補。又將杜篤祐等二缺。指名用手本移會。應否作缺。於十四日。接吏部文選司手本云。查得吏科左給事中杜篤祐給假。在未奉作缺明旨之先。自應聽限滿赴京供職。奉堂批照議。同覆到科。

今滿漢字原手本。見存臣科可察。而調元亦捏臣科爲背旨。又謂吏部司臣爲背旨。則滿漢堂司等官。前作看語後批照議者。豈盡背旨之人乎。近見內院陞補官員一疏。內將從前給假官。俱題明作缺。臣卽同臣科滿洲臣議云。前日吏部兩次俱說不出缺。今內院已題明出缺。應照內院事例。移明吏部。定爲畫一之規。又用滿漢字手本。移會作缺。見今部中回咨未到。臣科原以內院題奉欽依爲式樣。而反以臣爲贗贖。爲欺罔。爲甘心。爲背旨。調元眞良心滅絕之甚者。且調元疏云。內院何嘗問吏部。此言愈謬矣。夫內院之例。本衙門題陞。亦本衙門題缺。臣科之例。陞轉事故。吏部題缺。臣科止於照缺咨人。此所以再三移會吏部也。調元亦係科臣。當諳科例。反云待線索於他人乎。且杜篤祐一事。臣科滿漢臣花上吳亦哈等。共議於署。臣有何支吾彌縫。有何私心庇護。字字可問。如謂臣與杜篤祐有鄉情。豈吏部滿漢堂司等官。及臣科滿漢官。皆與杜篤祐有鄉情乎。况調元恨臣原非一日。調元四月內上俯抒愚忠一疏。諸臣在科同看。公揭內有聖躬出入無常。頻臨三院等語。臣率云。意固慙直。言亦關係。但接見大臣。乃皇上下交之美事也。此段未可輕進。調元聞之。怫然變色。恨已伏矣。又杜篤祐給假。調元係兵科左。應挨陞刑科都。後兵科都缺出。調元與臣在天安門內同行。向臣云。刑科也罷了。只是嫌刑科書辦太疲。本又多。每到日夕。還不得出衙門。味此數語。明示意於臣。覬陞兵部。故以臣科咨伊陞刑都爲大恨。又刑科外抄送吏科甚遲。昨吏部取打死人命一抄。係七月十七日本。下查八月十四日。尙未送到吏科。臣云外抄一月不發。有何緣故。令書辦持咨催取太急。此又臣開罪於調元者。積此數端。宜其相報之速也。總之臣任事太眞。口直

招怨。臣自知之。今調元誣臣爲背旨欺君。違例徇私。誑爲大言。以聳天聽。調元挾私之肝肺。昭然共見。六垣有是非。部院有公議。難逃我皇上洞鑒中矣。臣謹將始末情節奏明。伏祈敕下吏部都察院。一併察議。緣述屢次情節。字逾常格。統祈聖明鑒宥施行。謹具奏聞。奉聖旨。著一併察議具奏。該部院知道。

又

吏科都給事中臣魏象樞謹題。爲應推督撫官員。吏部宜遵聖諭。開列事實。以便會推事。臣伏讀聖諭內云。今後遇有督撫員缺。毋拘品級。須要從公會推。擇其品行才猷素著者。將行過事實。詳註會推本內。仰見我皇上重督撫之選。責九卿科道者。如此其嚴且切矣。臣附在會推之末。見吏部將應推督撫官員。每員各寫一籤。止開履歷籍貫。不開行過事實。九卿科道。既未見其行過事實。何由擇其品行才猷。且畫題之後。繕疏在吏部。而九卿科道。不復與聞矣。若事實不註於本內。則於聖諭不合。若諸臣未見其事實。而吏部自註於本內。又於會推不合。事關聖諭。臣忝言官。不敢不蚤言之。今後會推督撫之日。吏部應將行過事實。寫於籤內。先令九卿科道閱籤擇推。按其事實。參以公論。正陪既定。然後照籤註於本內。請旨點用。如果微臣所言。有合聖諭。伏乞敕下吏部。永爲遵奉。以便會推施行。謹題請旨。奉聖旨。該部知道。

又

吏科都給事中臣魏象樞謹題。爲遊僧干求書文。有犯法紀。乞敕禮部查逐事。臣竊惟輦轂之下。天下所往。僧道星卜。何所不有。近有一僧。名喚赤岳。徧持語錄詩扇。沿門送人。講道談禪。募化衣食。此亦閭黎之

常事無足深怪。但可異者。持書向臣等。干求書札序文。又欲於語錄之內。刊列臣等銜名。臣等言官也。書札固不敢作。若銜名附於方外之書。更無此理。萬一私付梓人。下壞臣等之官體。上關朝廷之功令。何物風魔。妄誕至此。臣等職在糾察。豈可止於拒絕。而不以入告乎。况臣等嚴肅衙門。尙敢干擾無忌。則其干擾諸紳可知也。設係高僧。自當入山清修。今乃紛瀆官長。妄犯清規。京師法紀之地。豈宜容留此輩。臣已同臣同官給事中林起龍。面說與北城坊官顧成學。羈查外。伏乞皇上敕下禮部。驗明度牒。查問來歷。如止無籍遊僧。速行驅逐境外。併通飭僧官。以後各寺廟嚴加查禁。再不許安歇此輩。犯清規而干法紀也。謹題請旨。奉聖旨。禮部嚴察議奏。

又

吏科都給事中臣魏象樞謹題。爲恭陳四款。以佐聖主勤民大政事。本月十五日。恭遇皇上舉行耕藉大禮。臣叨在追陪。竊見皇上星言夙駕。至誠格神。稼穡躬親。風和日麗。我皇上敬天勤民至意。真與帝王同揆矣。臣有一得之愚。關於民命。民情。民食。民困者。分列四款。爲我皇上陳之一用。真才以恤民命。國家數百萬金錢。皆百姓數百萬膏血。禾稼未登。先行徵納。徵納十分。朝廷尙不得五六分之用。其故何也。蠹役中飽者有之。劣官豪混者有之。徵無起解。解無批迴者有之。甚且撥兌之軍餉不發。地方之災荒不問。種種見之奏章。事事奉有明旨。皆今日不職之布政司也。臣思此官專管通省錢糧。必須心計之臣。才足察奸。不受一錢者。方能勝任。若概循資俸。未必盡得真才。臣考會典舊例。布政司與按察司缺。吏部推列正

陪請旨點用。務求真才。法甚善也。去歲臣已奏明。未蒙俞允。臣謂督撫而下。此爲第一緊要之官。近見皇上於會典未備之事。尙察舊例。况會典所載者。豈可無庸再議乎。伏乞臨御之際。詢問舉朝大臣。此官有無緊要。會典果否開載。臣不敢不仰遵聖諭。再三開陳。國計民命所關非渺小也。伏候聖裁。一慎刑獄。以疏民情。各省設一按察司。叅摯貪汙官吏。辦理冤枉軍民。職任甚重。故在內都察院。稱曰總憲。在外按察司。稱曰外憲。豈服皆同。謫官例不補用。爲其執法疏冤。察通省之刑名耳。若以律例不諳。才守不稱之人。爲之。或久獄不清。株連登佐。或斷讞失平。奸貪飭法。必至下妨農業。上干天和。近如畿北各府。重犯獄情。多至二三百起。無由申理。則各省必更多矣。臣請自今定爲歲報之法。如一年之內。每省共奉欽件若干件。已結若干件。未結若干件。開寫略節。比照布政司奏報錢糧事例。年終造冊。具本恭進聖覽。其各守巡道。承問事情。問擬充配以上者。亦於年終冊開情節。凡有情可矜疑。事屬淹滯者。各省報按察司。直隸報三法司。應駁正者。駁正。應糾叅者。糾叅。以副獄情不得延緩。重滋冤獄之旨。庶泣罪解網之下。卽雨暘時若之徵矣。伏候聖裁。一行勸懲。以足民食。食者民之天也。各省奇荒。流亡疊告。州縣官能安插撫集者。督撫題明。自應分別紀錄。臣不敢再贅。近見李百總收養貧民四百餘口。奉旨嘉賞。臣因思八旗之民。均屬朝廷赤子。設遇凶年。畿內地薄而物貴。豈盡度日豐饒之人。我朝在盛京。以農事開國。然後以兵威取天下。今丁口繁盛。倍於盛京。若各旗下人有衣食不充者。本固山牛录給與衣食。安插得所。豈有逃走生事之理。但勸懲須有良法。然後人心鼓勵。如某牛录下。察其給養窮人若干。則實加陞賞。某牛录下。察有窮

人未嘗給養。則實加罰懲。根本之計。不可不講。臣聞我太祖太宗。舊有此例。但耳目未確。不敢援引。伏乞敕下諸王大臣。察議施行。伏候聖裁。一均賦徭。以蘇民困。國家錢糧。京運有額。存留有數。其存留者。如師生廩俸。驛站料價。夫役工食。祭祀賓興等費。一一取給。毫不可少。我皇上准令紳衿優免丁糧。恩極厚矣。但紳衿免去一分。則百姓加派一分。富家多有前程。貧民代爲包賠。情極苦矣。其中儻有影射冒濫。病民更甚。臣請責成州縣。定爲歲察之法。如某地紳衿。某年某月所免丁糧若干。每年終通察。事故黜革。及宦家親族。不應優免者。該州縣官逐名造冊。申報督撫學院學道察核。卽減去百姓包賠之數。大張榜示。令民通知。如有影射冒濫等弊。容隱不報。仍苦窮民。及地荒丁逃。編派不公。拖累戶甲者。該督撫立行叅奏。以溺職論罪。果能清察此弊者。卽當優薦。如督撫提學不肯實行者。部院科道訪實指叅。分別處治。庶窮民止包實在之紳衿。或不致苦累逃亡矣。伏候聖裁。以上四款。臣皆舉目前關切。有裨皇上勤民之大政者。敢進芻蕘。伏乞聖明採擇施行。因係列款。字溢常格。統乞鑒宥。謹題請旨。奉聖旨。這條陳四款。有裨勤民。著詳議具奏。該部知道。

又

吏科都給事中臣魏象樞謹題。爲俯陳愚見。推廣皇仁事。臣伏讀聖諭。見我皇上軫念畿輔饑民之苦。夙夜焦思。皇太后再布慈恩。共發內帑。及節省銀二十四萬兩。特遣滿漢大臣十六員。賑濟八府。廷臣咸稽首而頌曰。堯舜之心。愛民如此。諭內所云散給均沾。清察奸弊。諸大臣自優爲之。又何庸臣之贅言哉。臣

竊謂大臣奉命而往。如代皇上躬履民間。須於賑濟之中。兼行省問安插之事。但有綸音未及。未便專行者。臣不敢不推廣而言之。一地方災荒。輕重不等。有本地逃亡而去者。亦有別地就食而來者。一體賑濟。固不待言。但恐流民餬口有資。棲身無地。雖獲目前之生。終作漂零之鬼。合無將各府州縣。及所屬村堡等處。空廨官房。庵觀寺院。設法安插外。其紳衿商民。或有願出空房與饑民居住者。或有願養饑民十口至百口者。大臣酌量多寡。如十口以上者。應量給匾額。便宜旌獎。如三十口以上者。應具本題報。分別敘錄。向來大家富戶。因懼隱匿逃人之禍。凡流民所到地方。概行驅逐。不敢收留。寧視其死而不救。恐與人飯一盂。湯一盃。便不能自保身家。嗟乎。人與人相仇。成何太平之世界。今皇上大沛恩澤。好義之人。豈無感動。必須大臣給與關防執照。使人坦然無疑。設有逃人。後不受累。大戶樂收樂養。饑民有食有居。我皇上二十四萬兩賑濟之恩。始有實效矣。一地方災荒之後。百姓既不能養贍妻孥。必不能早辦錢糧。或有官不恤民。追比預徵。青黃不接。敲骨吸髓。或有地方驛馬本色。及明末加添賦徭等項。重累百姓。苦難支持。逼迫逃亡。非盡災傷之過。今大臣出京。首當以問民疾苦爲事。每到一處。延見父老。虛心體訪。某項累民。勢當蠲除。某官害民。法宜糾劾。復命之日。逐一詳奏。立見施行。俾流民知皇上去其害而除其累。人人有鄉井墳墓之思。逃者可以復返。貧者可以不逃。富者可以不貧。我皇上二十四萬兩賑濟之恩。益被無窮矣。以上二款。皆臣仰體堯舜之心。不敢虛簡。差大臣之意。故推廣及此。伏乞皇上垂鑒愚忱。俯賜採擇。俾大臣得以朝聞命而夕奉行。若下部議覆。恐耽時日。統乞聖明裁斷施行。謹題請旨。奉聖旨。這所奏賑

濟內事宜。已有敕諭。該部知道。

又

吏科都給事中臣魏象樞謹奏。爲臣母抱病日久。謹陳下情。迫籲聖恩事。臣碌碌庸材。由丙戌庶常。叨授言路。八年待罪。荷恩如天。尺寸之效未成。君父之心難報。臣清夜自審。踵頂宜捐。敢言將母乎。獨念臣母李氏。今年六十有六。脾胃素有弱疾。溼痰左注。肩臂刺疼。臣前歲迎養入都。不服水土。卽返家鄉。抵里以後。脾胃不調。飲食減少。雖延醫調理。未能對症。冬暮兩接家信。俱云食少體瘦。心動不寧。臣以垣務正繁。省視可緩。本月再有信至云。臣母日夜憂鬱。望臣一見。書中之語。一字一淚。臣口不能讀者久之。時值皇太后聖誕。又值皇上舉行耕藉大禮。未敢瀆奏。臣思人之一身。養氣生血。脾胃爲本。若根本不和。榮衛不周。盛壯之人。亦成大病。况臣母望七之年。氣血微弱。萬一誤補誤消。所傷不小。臣粗通藥味。未獲親嘗。不惟魂夢不安。亦非所以仰體我皇上孝治天下之心也。臣查兵科都給事中姚文然。有給假省親之例。近日侍郎孫廷銓。臺臣李敬。各以陳情得蒙俞旨。臣有情而不言。與草木等耳。不更辱朝廷耳目之班哉。伏乞皇上垂憐至情。敕部察覆。允臣歸省。臣與孀母。均感錫類之仁。且臣科滿漢濟濟。又有起用候補之官。缺出隨補。毫不廢事。臣母儻邀聖明之庇。調治數月。病痊身健。臣卽星馳赴補。區區犬馬。報答宏恩之日正長也。臣不勝懇切待命之至。謹具奏聞。奉聖旨。著察例議奏。吏部知道。

又

吏科都給事中今降一級調用臣魏象樞謹奏爲遵諭回奏事本月初二日臣隨九卿科道在午門內共聽甯完我叅陳名夏一疏奉聖諭陳名夏父子濟惡科道何不糾叅都著自行回奏臣此時又聞本內言名夏與臣係四門親家結爲一黨等語臣旣深惶愧又抱黑冤因於本日羈部候議未得與諸臣一同回奏今核議已明於十三日刑部傳臣奉旨無罪免議臣八載孤蹤半世名節始得明白於聖主離照之下臣生固無愧死亦無憾矣何敢不據實回奏夫知無不言言必有據方盡言官之職名夏肆惡內院皆綸扉祕事臣從何得聞敢向何人訪問乎臣所以不能知名夏之肆惡內院者此也至伊家住江寧臣平日亦聞其一子放蕩爲非而說情受賄生事害人之惡蹟若有一二實據臣何憚於名夏而不以入告耶緣臣從未身到南省聞見不真在京又未細加體訪不敢揣摩而具彈章臣所以未經叅名夏之惡子者此也今被院臣甯完我摘發名夏父子多款而臣如在夢中古來豈有如此之言官哉我皇上不卽罷斥薄示降處臣清夜自返中心何安理合補牘請罪字字皆臣之實情字字皆臣溺職之咎也臣無任惶悚待命之至謹具奏聞奉聖旨已有旨了該部知道

又

詹事府主簿臣魏象樞謹奏爲首疏遵諭詳陳治平之大綱以佐宏謨以抒愚悃事臣跪讀皇上求言之諭下及七品官員臣雖濫附七品竊愧素餐安有確見良策仰答周諮至意哉臣惟勵精圖治貴攬其大綱養兵救民宜責之大吏譬如善治病者不求其本原而紛投其藥劑無益也臣所謂大吏者在內則六

部之卿貳。在外則各省之督撫。是也。臣所謂大綱者。內之卿貳。可以察督撫。外之督撫。可以察有司。是也。夫兵民大政。無一不由六部題覆。故督撫行事有叢弊之處。六部知之必多。察之亦最易。何也。每事各有副書可據。每事各有底案可稽。其易察一也。吏部分省而設官。原以資賢否。別部分司而治事。原以專考成。其易察二也。部臣嘗有領兵抽稅。出差於各省。久駐於地方者。如兵馬虛實。百姓苦樂。親眼見過。其易察三也。祇因向來責成未專。而諸臣遂以任議爲分途矣。臣請皇上特頒六部嚴覈兵民利弊。專敕各一道。令其今後詳察各督撫奏牘。薦章咨揭文冊。內有不公不法。大弊大害。推諉徇徇。延緩糊塗者。即許具疏叅奏。酌量處分。如該司未經說堂。而堂官查出。則過在司官。如司官說堂。而堂官不行具奏。則過在堂官。又慮堂官料理一部之事。頗云浩煩。郎中掌管一司之事。何難稽核。况吏書上下其手。每乘司官更易其人。若以曹署爲傳舍。必致事務之因循。今後郎中除考選陞遷外。應照掌科掌道之例。俾專理司事。不許在外出差。前任員外主事時。已經輪差。臣之所言。亦非偏也。再請皇上倣唐太宗以都督刺史姓名疏於御屏故事。將滿漢大小九卿科道官。每員製一大籤。督撫等官。每員製一大籤。各疏其名。各製一筒。時隨皇上左右。如某臣擔大事。某臣發正言。即於籤上御筆記一功字。某臣有充位望缺等情。某臣有富貴恩怨等情。即於籤上御筆記一過字。遇我皇上接見臣工之時。復掣督撫一二籤。詢其貪廉功過。亦於籤上御筆記之。則卿貳督撫等官賢否。難逃皇上睿鑒之中。若諸臣承明問。而有一言代飾。一語中傷。是欺天地也。欺父母也。其誰敢乎。如此而異日之賞罰黜陟。既有把柄。再加察核。方可以鼓勵羣心矣。至於察

吏安民。人人言之。臣常有二語曰。舉劾當則見督撫廉明。舉劾不當則見督撫貪昧。近讀上諭。今後督撫薦舉官員。開報事蹟。如有不實。一體究治。我皇上洞悉薦舉不實之弊。故著此令。以垂永久。但事蹟二字。天語止示其要。而微臣力請其詳。所有酌定薦舉道府等官者。計拾格。薦舉武職官員者。計拾格。薦舉州縣等官者。計拾貳格。皆臣仰體宸懷。俯竭一得。另疏呈覽。以聽上裁。亦略倣六計之古法也。任各官之賢者。以爲善。而否者。以爲苛。臣總不顧耳。自今以後。凡有舉劾。文官責吏科。武官責兵科。各註一冊。專查舉劾不實之弊。以副一體究治之旨。庶法可實行。舉足勸而劾足懲矣。臣正在繕疏。見諸王貝勒大臣九卿詹事科道等。議差巡方。奉有依議之旨。並飭以後巡方薦舉。照式通行。可無參差也。臣庸才淺見。議論平平。惟願內外諸臣。打起精神。實心任事。上分宵旰之勞。下造兵民之命。只在力行。而不在多言矣。如果臣言不謬。伏候採擇。字數溢格。統乞鑒宥施行。臣無任惶悚待命之至。爲此具本。謹具奏聞。奉旨。該部議奏。

又

詹事府主簿臣魏象樞謹奏。爲次疏恭陳薦舉各官格式。以重治兵治民之人事。臣前疏奏明薦舉官員。開報事蹟緣由。此正兵民疾苦之根源也。所關既重。不厭其詳。除專管漕政、鹽政、學政、馬政、河政。各據本官操守。本等職業開薦。或有殺賊禦寇。轉餉開荒。勞績異常。特疏優舉外。臣酌錄循例薦舉格式上聞。如有一二可採。伏候敕下該部。轉行各督撫巡按一體遵行。爲此具本。謹具奏聞。計開薦式於後。應薦文官一員。某人。係某年某月到任。今經幾載。薦錄幾次。一曰戶口。本官未任以前。原額丁口若干。任內審編幾

次開除逃亡死絕丁口若干。增益丁口若干。竝無賠累遺漏等弊。二曰錢糧。本官未任以前舊欠錢糧若干。本官帶催完解若干。任內應徵錢糧若干。本官見經徵解若干。易知由單。於某月給民。竝無縱容櫃頭私加火耗。已經蠲免。暗行徵收等弊。三曰驛站。本官未任以前。驛馬若干。任內實存驛馬若干。缺額買補若干。官喂官當。竝無飛灑里甲。暗派草料工食。及買馬銀兩等弊。四曰詞訟。本官審理詞訟。當堂剖斷。卽發審單。有罪定罪。無罪免科。任內竝無受賄受囑。令親友住居境內。暗送人情。顛倒是非等弊。五曰學校。本官任內。學廟有無修理。月課生員某人等若干。次鄉試中式某人等若干。竝無結交劣衿。凌辱素士等弊。六曰城池。本官任內。城池有無築浚。果否完全。竝無毀壞等弊。七曰衙蠹。本官額設衙役若干。任內拏過朦官害民積蠹若干。竝無縱容勾攝。嚇詐鄉愚等弊。八曰土豪。本官任內。講說鄉約。拏過真正豪惡若干。果係刁訟欺良。卷案可據。果係恃財倚勢。實蹟可憑。竝無捏害拏訛等弊。九曰行價。本官任內。所帶家口若干。取用民間貨物柴米等件。實係見價發買。竝無指勒虧短等弊。十曰餽送。本官任內。不受餽送。亦不與上司餽送。竝無派取民間皮張土物。繳回原價。諂媚上司等弊。十一曰積穀。本官未任以前。積穀若干石。任內自積若干石。某年某月救荒。用過若干石。實存若干石。果係自理紙贖。及存留項下節省。竝無濫罰瞞取等弊。十二曰保甲。本官稽查有法。任內拏過盜賊若干名。解過逃人若干名。安過流民若干名。竝無縱役騷擾。扳害無辜等弊。此一官者。係某道某府某廳開報事實。臣覆訪果確。輿論允孚。可稱賢良。實堪薦舉。應薦武官一員。某人係某年某月到任。今經幾載。薦錄幾次。一曰月糧。本官所管兵馬若干。每

名每匹月給餉銀若干俱係實數分散。竝無侵扣尅減等弊。二曰功次。本官任內曾經戰功幾次。敘錄幾次。竝無殺擄冒功及退縮失機等弊。三曰軍器。本官所部器械若干。弓矢若干。礮藥若干。竝無損壞不修等弊。四曰馬匹。本官所部馬匹若干。俱符原數。竝無瘦弱倒死等弊。五曰訓練。本官所部兵馬幾日操演一次。勸懲有法。竝無怠惰偷安等弊。六曰約束。本官所部兵丁盡聽約束。竝無占房奪物。生事害民等弊。七曰占役。本官所部兵丁若干名。俱係實充營伍。竝無坐名食糧。倩人充數等弊。八曰受詞。本官一切詞訟。毫無干預。竝無私受稟狀。指稱盜賊軍務名色。挈人詐錢等弊。九曰行價。本官任內所帶家口若干。取用民間貨物柴米等件。實係見價發買。竝無指勒虧短等弊。十曰餽送。本官任內不受餽送。亦不與上司餽送。竝無派取民間皮張土物。繳回原價。諂媚上司等弊。此一官者。係某鎮某道某府某廳開報事實。臣覆訪果確。輿論允孚。可稱賢良。實堪薦舉。應薦道府官。某人係某年某月到任。今經幾載。薦錄幾次。一曰開報所屬賢否。本官所屬官員正印若干員。佐貳若干員。報過廉能幾員。貪酷幾員。竝無徇庇濫枉等弊。二曰謝絕所屬餽獻。本官所屬官員概絕餽獻。嚴禁參謁。及解報錢糧勒索火耗滴珠。扣批不發等弊。三曰清理所屬盜賊。本官所屬地方舊有零星盜賊。撫過若干。勦過若干。竝無致民從盜。指盜殃民等弊。四曰查核所屬錢糧。本官所屬地方額徵本色若干。完至幾分。易知由單。派發如期。竝無暗侵私派。既免重徵。及縱收耗羨等弊。五曰補救所屬饑荒。本官所屬地方某處饑荒。設法賑濟若干。所屬有司某處豐稔。安插流民若干。有冊報明可據。六曰平允所屬刑獄。本官所屬軍徒以上罪犯共若干起。欽案共若干。

件審結若干件題報若干件竝無淹滯出入等弊七曰均濟所屬驛站本官所屬驛站某衙某僻協濟均平驛遞竝無疲累偏苦等弊亦無侵蝕驛銀致壞驛站情由八曰訪拏所屬衙蠹本官所屬地方某州某縣拏過蠹國害民積蠹若干報過贖若干竝無陷良包贓等弊九曰禁戢所屬紳豪本官所屬地方有無惡紳土豪某抗糧害民應懲處者懲處某捐貲救民應優禮者優禮十曰約束所屬兵弁本官所屬兵丁無論標營嚴行約束竝無縱容擾害民亦無濫收聽用官弁招搖生事等弊此一官者係臣確訪的實輿論咸孚可稱賢良允堪薦舉以上如有不關職掌不合格式者卽於本內註明其道府廳官姓名不許遺落致煩撥查奉旨著議奏該部知道

又

詹事府主簿臣魏象樞謹奏爲三疏恭陳拯救兵民之節目以濟時艱以抒愚悃事臣聞民者國之元氣也兵者國之神氣也元氣不消而神氣自旺故治道與醫道恆相通也臣讀上諭曰知其病卽備其藥我皇上蓋欲諸臣治其本不欲諸臣治其標耳臣前疏謬舉大綱愧無一當曷敢執管中之見妄言拯救乎惟皇上念兵之勞而厚其恤兵可無楊柳雨雪之悲皇上重民之命而不忍傷民始有父母妻孥之樂臣再列四款均屬節目不揣愚昧敬陳御前可乎一邊方衛所城堡等處所徵有地畝糧歲納米豆本色各設同知通判及衛官專管催徵收貯倉廩以備客兵之需守兵月糧間或搭放其實多有紅朽臣生長邊地知之頗真未見每歲果否彙報屢年積儲若干合無敕部確察數目某處米豆可養某處兵馬再搭某

處鑄錢放給。如額數果敷。將戶部撥解餉銀。通盤打算。節省若干。加養滿洲出征之兵。以後該撫每年奏報。勿致侵蝕。設遇歲荒。奉旨免徵。再撥餉銀。亦爲至便。伏候上裁。一買房稅契。律例開載甚明。防奸僞而佐國用法。至嚴也。題發各省。未見遵行。蓋因買房之家。多係富厚。與地方官情面結交。故不肯實心查報耳。以天下之大計之。歲可得稅數十萬。而置之不問。契尾豈故紙乎。律條豈虛文乎。臣請自今爲始。敕部徹底清查。各省報解若干。以後作何考成。務要年終奏報。勿致漏侵。歲積若干。加養滿兵。不費敲撲。不苦窮民。可佐國儲。可信律令。伏候上裁。一八旗安插窮人。臣去歲二月內。具有恭陳四款。以佐勤民。大政一疏。隨經戶部覆准。傳諭各固山牛录章京。並殷富者。有能捐貲安插窮丁。即將捐過數目。報部具題。分別敘錄。今經一載。臣未聞有無報部。曾否敘錄。亟宜舉行。以存太祖太宗考察激勸之意。再請於八旗共立義倉一所。凡旗下有好義之家。願輸銀米者。記檔報部敘錄。至於犯事職官。除情罪重大。照律處治外。其餘輕罪。有應革一箇前程。半箇前程者。乞皇上念其本身汗馬。及祖父血戰之功。免革前程。比照漢官犯罪折贖事例。重議罰贖折米若干。納於義倉。戶部委滿洲烏金超哈副理事官各一員。掌管出入。兵苦則用以濟兵。丁窮則用以濟丁。亦救災恤困之一法也。伏候上裁。一流民已經奉旨安插。臣不敢贅言矣。臣嘗讀尙書云。元后作民父母。又讀皇上之旨曰。朕心以愛民爲主。古今正相符也。惟願皇上重愛民之官。懸愛民之賞。然後可以成愛民之政。如近日招民百名出關者。疏內議定。准授知縣。故招民漸多。獨安插流民者。疏內止有旌勸之語。未嘗議定一級之賞。均是民也。均是招集安插也。彼何故而賞之厚。此何故

而賞之薄也。臣請皇上大沛綸音，明示天下。凡地方官有能安插流民得所者，每百名准加一級，俸滿優陞。其百名以下者，止許紀錄。該督撫務體皇上愛民之心，每半年具題一次，以報其功。每省安插千名以上者，督撫及該道亦各與紀錄。從此救活一民，則朝廷多一赤子，海內舉手加額，頌我皇上父母之心，與鼓舞之用，兩無窮矣。伏候上裁。臣才本碌碌，議自平平，雖竭補救之愚忠，無濟廟堂之碩畫。且臣邸報缺略，恐涉雷同。疏字冗長，深愧瑣瀆。統乞鑒宥施行。爲此具本，謹具奏聞。奉旨：該部議奏。

又

光祿寺寺丞臣魏象樞謹奏。爲臣母年老病深，比例籲恩終養，以承孝治，以盡子情事。臣本庸材，叨中丙戌科進士以來，歷官有年，奉職無狀。仰荷皇上天高地厚之恩，雖捐頂踵，不能報萬一。然有萬不容已之苦情，不得不實陳於君父之前者。臣惟天下之樂，莫如以祿之及親，人子之情，尤願其親之難老。臣獨何心，乃養親而忍言終也。竊念臣母李氏，年七十一歲，素病痰火，脾胃至虛，常賴藥餌調養。屢病屢痊。十四年七月間，臣迎養北上，每日止行三四十里。幸達京邸，就食天祿，不意水土不宜，脾胃愈弱，痰火之症大作。臣母呼臣名而泣下曰：「我來原欲母子相依，俾汝爲朝廷報效，勿分念也。今病急矣，宜速回家鄉，爲終老計。汝當小心盡職，待我病不可支之日，令汝知之。」臣隨令臣妻李氏扶歸原籍。突於閏三月初四日，接得臣母示臣家信云：「去冬十二月，今春三月，衰病日甚，汝宜知之。」臣驚問來人，據云飲食減少，痰氣上攻，胃腕熱如火灼，以致白髮滿頭，形神疲困，非復昔日別臣時光景。且兩眼昏花，視物不真，惟刻刻見臣如

在目前也。痛思臣母兩地相隔。風燭朝露。寸寸牽腸。而臣之菽水湯藥。無一克盡。慈烏反哺。更在何日。但臣此身爲皇上生成之身。此日正臣圖報之日。遽爾陳情。實有戀戀未能出口者。惟致書寬慰。臣母健飯。是臣之幸也。四月二十四日。又接家信。及家僕魏居口傳。臣母病狀不減於前日。臣求方製藥。星夜寄回。而平安之報。月餘未聞。藥之對症與否。莫能懸揣。心思搖亂。夢寐驚疑。此臣萬不容已之苦情也。伏覩我皇上以大孝治天下。以至誠體萬物。內外諸臣。陳情合例者。俱蒙俞允終養。因查會典一款。凡官員母老。雖有兄弟同父異母者。准令終養。臣有兄象懸。係庶母趙氏所生。分居近二十年。此外竝無兄弟。正與會典開載及詞臣沈世奕。史大成。中書臣吳鶴祥等所請事例相符。仰懇睿慈。俯憐下悃。敕下吏部察覆。准臣終養。以盡臣爲子者一喜一懼之心。臣材庸劣。年甫強仕。不第終身犬馬之報。爲日正長。卽臣母子生生世世。銜恩無既矣。爲此具本。謹具奏聞。奉旨。吏部察例具奏。

